



皇明嘉隆聞見紀卷之十二

穆宗莊皇帝

丁卯隆慶元年



春正月丁巳朔○詔加武英殿大學士徐階少傅李春芳太子太師郭
 朴太子太傅舊制初即位皆賜金幣時以國帑方絀止給誥勅如例已
 給者加散官勲階○詔加大學士高拱少傅兼太子太傅以吏部左侍
 郎陳以勤為禮部尚書文淵閣大學士禮部右侍郎張居正為左侍郎
 東閣大學士俱入閣叅贊機務以侍講殷士儋為禮部右侍郎待詔王
 凝劉奮庸俱為尚寶卿加諭德唐汝楫太常少卿致仕論潛邸功故命
 各加官既而以勤上謹始十事一曰定志言陛下方臨御之初窺伺百
 出倘志不先定將上累聰明下妨政事惟堅持聖志一意主求太平此
 志既定則凡聲色貨利逸遊便佞皆不足惑盛德大業悉從此出此謹

始第一義也二曰保位言自古言保位者曰帝慎乃在位曰予臨兆民
凜乎若朽索之馭六馬願常以萬幾叢勝為虞世道阽危為患三曰畏
天言當深察天道甚邇雖深宮燕閒人所莫窺常若上帝鑒觀雖號令
臣民靡不如意常若嚴父譴誡瑞應之來脩德應之災異之見引咎回
之四曰法祖言太祖肇造鴻圖成祖嗣成大烈其垂訓立法至宏且遠
願恭取祖訓置之左右守而勿失仍勅中外諸臣一切遵率如故五曰
愛民言宜省非正之歛停不急之征黜貪暴之吏蠲繁苛之令蕩然與
天下休息而聖衷又念念在民則久安長治術無出此六曰崇儉言太
祖乘輿服御以銅代金成祖所服衣袖常至敝垢意以尺帛一錢皆百
姓膏血願躬行素約自禁近始悉從省約凡宮中奇巧之玩無名之賜
一切罷之七曰攬權言凡朝廷大興革人材大進退宜悉與大臣參詳
可否而臨以明斷親自裁決則威固于內權重于外天下可運諸掌八

曰用人言太祖嘗言用人之道當知奸良知良不用知奸不去則誤國
自此始願深味此言於大小臣工一一清心照之則衆正途開群枉門
塞而大業成九曰接下言祖宗朝每召見群臣講論治道至大誥首著
君臣同遊之訓願視朝之後即御便殿召大臣親自擬議十曰聽言言
祖宗時軍民凡有可言之事許直至御前陳說願大開言路言之當者
顯擢其人其未當而或過于許直者亦涵容不罪夫言者上逆龍鱗而
犯忌諱下結讐怨而取禍患亦何所利其心蓋忠于國也宜諒其心使
得盡言無隱疏入 上嘉其忠愛懇至悉納之○擢大理左少卿鄒應
龍為太僕卿 刑科給事中胡應嘉等疏請躬決庶政從之應嘉等言
祖宗朝軍國大事皆天子躬臨臣下處斷英宗以冲年未能面決輔臣
楊榮權創早朝奏事之例先期擬答進御臨朝遽以傳旨遂沿為故事
唯孝宗接見延訪治道斯隆陛下以長君踐祚章奏僅憑札牘上下竟

爾睽隔左右投隙百弊滋興不可不防其漸也願每日朝罷必御文華殿令三四輔臣不時進見凡因革用舍大政咸與面計裁決事屬六部則召對諸卿義當疑難則顧問諸臣庶神智不勞而聰明日擴又考前代宰相入閣議事必使諫官隨入而國朝之制令六科輪班于殿廷左右紀錄聖旨蓋亦前代遺意乞恢弘舊典此後接見大臣宜命科道更番隨入凡有奏事不忠者聽其面折是非或退而參奏疏入。上是之。○詔錄用建言得罪諸臣吏部尚書楊博遵遺詔上言先朝建言得罪諸臣如樊深丘樺楊思忠尹相魏良弼李用敬陳攢胡時來周怡沈束顧存仁趙軌張選袁世榮何惟栢趙錦張登高黃正色方新張檟凌儒申仲王時舉馮恩徐學詩周冕張紳董傳策劉世龍唐樞毋德純等三十三人宜遵遺詔錄用。上命俱還原官以次推補又言諸臣中以建言死者其等有二戮死者為一等應復官贈蔭加諭祭若楊繼盛郭希

顏沈鍊楊允繩凡四人其次廷杖死者應復官贈蔭若楊最王思薛宇鎧何光裕裴紹張原浦鍊曾紳世經周天佐伍瑜臧應奎殷承叙凡十三人又次繫獄戍邊斥死牖下者應復職贈官若唐胄李璋豐熙楊慎楊名王元正羅洪先徐文華張紳張傑劉濟劉琦馬錄程啓元盧瓊陳讓桑喬包節王宗茂余翔方一枝劉魁余寬黃待顯陶滋相世芳王與齡章鑰凡二十八人至于尚書熊浹諫止仙箕御史楊爵彈擊權倖二臣雖罪止斥逐然其忠義風節世所共仰又當與杖死者一體卹錄議上從之贈熊浹少保謚恭肅○諭示免朝時初七日傳免朝至十一日復傳免朝給事中魏時亮上言皇上初政甫及一旬免朝至再得非獻諛者以先帝為辭乎先帝初年日御經筵親賢納諫二十載無倦晚歲雖云不朝而明于親輔臣剛于制近習斷于去奸邪故群小畏法庶政不紊奈何以初政而遽怠乎奏入留中○上孝恪皇后杜氏尊謚曰孝

恪淵純慈懿恭順贊天開聖皇太后太后 上生母也父杜林贈慶都伯至是封林子繼宗嗣伯○賜百官上元節假時賜假十日諸司仍奏事自是歲以為帝○禁民間放燈○詔起諸臣時吏部尚書楊博請起用南京禮部尚書葛守禮戶部侍郎趙貞吉右副都御史林雲同右僉都御史曹邦輔右布政鍾卿副使曹金金立敬殷邁僉事謝庭濂等從之○上大行皇帝尊謚曰欽天履道英毅聖神宣文廣武洪仁大孝肅皇帝廟號世宗

謹按禮官會議帝謚曰罷一璫之出鎮而宿弊革于朝廷剪勲戚之內訌而陰禍消於宗社恩無掩義靈政者雖貴必誅斷以定謀干紀者雖親必僂闡性道則敬一有箴五箴有註上接精一之傳敦綱常則明倫有典明堂有問曲盡尊親之道攘夷狄則狼烟息警鯨海澄波征叛逆則警服南交蕩除群盜定營制以作六軍徵將材以備九

伐報祈歲舉賑貸詩施慎獄屢勤於欽恤課吏嚴黜乎貪殘奉獻廟極追崇之典侍慈宮竭就養之誠躬卜吉兆於純山肇舉曠儀於大享惟茲衆美之咸備實皆剛德之所成按謚法剛德克就曰肅號曰世宗比漢武帝光武帝

詔復除周怡沈束為給事中○擢戶部主事海瑞為尚寶司丞○削籍鄆懋卿有罪發戍邊○下方士王金等于獄論死○詔削奪故真人邵元節陶仲文官爵及誥命籍其田宅○命撤西苑諸殿閣扁額時西苑有大高玄殿圍明諸閣五廡諸宮部議盡毀修建齋醮諸宮殿禮部尚書高儀惜其材費請止去扁額從之○加上孝潔皇后尊謚曰孝潔恭懿慈睿安莊相天翊聖肅皇后孝烈皇后尊謚曰孝烈端慎敏惠恭誠祇天衛聖皇后○加元妃李氏尊謚曰孝懿皇后封后父李銘為德平伯后兄李宦為都督僉事○二月冊繼妃陳氏為皇后封后父陳景行

為固安伯。○詔贈刑部尚書鄭曉為太子少保謚端簡。○詔革諸匠役官職時內官監李芳奏劾工部尚書徐杲監生王儒等六人前修蘆溝橋侵銀巨萬請下法司究問杲匠役以營建宮殿冒叨冬卿之銜而一時工役為太僕苑馬少卿者二人為布政司叅議郎中負外者五人鴻臚光祿官以百數名器輕濫已極。上心惡之至是因芳言下吏部議革。○司禮太監黃錦王本馮保等廢弟姪錦衣千戶。○上親祭肅皇帝几筵時屆清明節也。○詔罷玉芝宮歲時享祀日供膳如舊。○御史王得春疏陳八事時皇后不見禮于上移居別宮中外以為憂故得春以八事條上一曰早正母后之位而先帝宮人未經進御者宜放出以消陰邪二曰祀典甚大而師宗記無職太常宜罷黜以正昭格之禮三曰名器甚重徐杲以匠役而叨部卿服緋魚廢世祿不可為訓四曰輸納白糧物料當令部科收驗勿委內侍以困糧解及禁奸諛慎題覆重貢

選恤災傷皆切時弊奏下所司。○三月詔裁上林監苑隸卒太監李芳言上林苑監內官各有定秩而祗候阜隸近年妄增者宜裁之以節費從之著為令。○御史龐尚鵬請御文華殿延見宰輔李叔和請敬大臣以圖治道周弘祖請勤政事給事中魏時亮馮成能周世選孫枝各以勤政御朝請疏入俱不報。○吏科給事中王治疏上四議一曰議宗廟之禮以隆聖孝言先帝追崇獻皇大備尊稱誠萬世不刊之典至入廟稱宗一事在今日尤當議者古者宗廟始祖百世不遷其次昭穆迺祀非薄之也厭于祖也先帝擬周文武世室尊成祖如太祖此義起之禮若獻皇帝雖貴為天子之父而實未嘗南面臨天下今乃與祖宗諸帝並列雖親為武宗之叔父而實嘗北面事武宗今乃設位于武宗之右揆之古典終為未合或獻皇亦有未安乎先帝于獻皇祔廟之後世室之祀尚並舉之是先帝之心亦有未安者聖慮淵微似待今日蓋進享

太廟千分若尊而不免于祧若別祀世室則為萬世不祧之主先帝遺詔祔享孝潔皇后而別祀孝烈夫婦之義既正矣矧宗廟太禮可沿一時之成跡乎乞勅廷臣詳議以求至當于以光先帝大孝二曰議朝講之禮以圖治安言祖宗創制御殿御閣各有成規早朝午朝皆有定式經筵有禮日講有儀左右鈔選英賢題奏面相可否今雖梓宮未行哀慕方切而朝講之規所當預定三曰議親輔之禮以成德業言今皇上之御輔臣恩數徒隆而接見踈爵賞雖崇而情旨隔必信老成如著蔡倚謀斷如師模披閱疏章面商事理以奮治功四曰議燕居之禮以澄化原言人主深居禁掖隔遠外庭左右便佞窺伺百出或以宴飲嚴樂或以遊戲騎射或以技藝貨利使人主接之不以時用之不以禮近則敝損精神疾病由生久則妨累政事危亂從起不可不慎近聞人言嘖嘖謂宮中燕間舉動有非諒陰所宜竊意聖明必無此事然臣子防微

杜漸不敢不言乞謹服御惜精神優禮中宮以收儆戒之益慎簡近習以端承弼之選奏入納之○葬肅皇帝于永陵孝潔肅皇后孝恪皇后祔焉○諭脩世宗肅皇帝實錄以張居正陳以勤高拱充總裁官○贈刑部左侍郎劉玉為刑部尚書謚端毅初玉以大獄罷士論寃之至是詔加卹錄○夏四月重錄永樂大典成加徐階等官階有差○詔罷進獻時 上諭進鮮船隻騷擾地方及太常寺給散牲價一切宿弊承天府香米等物及外夷珍禽異獸俱各停止不許進獻○詔察吏治吏部尚書楊博奉詔疏陳天下郡邑衝僻繁簡不同有逸而得譽有勞而速謗既乖黜陟之宜遂起趨避之徑今品第上中下三等推陞選補量才授任不惟視等以為歲月之遲速仍視第以為官資之高下每省總括數語以陳其槩細列等差以盡其詳使覩殘破則思保障之畧覩困疲則思拯救之猷盜賊則掃蕩而撫循灾傷則賑施而安輯刁頑則移風

而善俗衝繁則愛人而節用庶實政脩而成功可課疏 上嘉納令銓
曹奉行○追復王守仁為新建伯謚文成命其子正億襲封○詔追贈
諸臣官賜謚贈周尚文為太傅謚武襄蔣冕為少師謚文定喬宇為少
傅謚莊簡汪俊為少保謚文莊呂柟為禮部尚書謚文簡石珪為少保
改謚文隱為文介○詔追奪尚書顧可學徐可成侍郎朱隆禧郭文英
贈謚誥命○戶部尚書高燿致仕以葛守禮代之尋守禮乞終養歸以
馬森為戶部尚書○刑部尚書黃光昇罷以毛愷為刑部尚書先是光
昇媚旨擬海瑞死為公論所薄至是罷去以毛愷代之○兵部尚書趙
炳然以疾乞休以郭乾代之無何致仕以霍異為兵部尚書○五月諭
幸舊邸時 上諭禮部朕將以十二日出幸舊邸尚書高儀以巡幸無
名恐開逸遊之端疏請停罷御史王好問上言皇上孝思純篤先帝上
宵日侍几筵徬徨若失大統既紹毀傷過禮靈駕既發登陟顧望情不

自勝此皆天性至孝中外傾戴今山陵既畢羨墻漸遠若乘時遊幸動
或違禮對景娛樂言或詖淫皆足以伐天和而虧盛德夫以日易月雖
仍近俗而三年孺慕實本天經亮陰之禮豈容踰越今輔臣既無由入
侍而暫御不皆正人惟皇衷深自抑損以全至孝諫入不從○詔復楊
廷和等官賜謚廷和復大學士謚文忠王廷相兵部尚書謚肅敏梁材
兵部尚書謚端肅侍郎魯銑謚襄愍楊守謙謚恪愍商大節謚端愍副
都孫繼魯謚清愍侍郎江曉程文德張漢俱復原職賜林俊謚貞肅具
廷舉謚清惠○禮部尚書高儀疏請召對言我朝列聖接見輔臣燕對
同遊造膝陳悃上下交泰皇上御門條奏漸復舊規而朝著尊嚴情禮
不洽今山陵已畢經筵日講咸宜舉行便殿面議尤不可緩乞時召六
部大臣各奏章疏以決可否 上嘉納之時給事中張鹵亦上言陛下
自即位以來視朝太遲經筵日講多輟接見太稀臣下章奏多不省覽

此數事非所以圖治也留中不報○詔謫御史齊康外補康以大學士高拱屢被論劾意大學士徐階主之乃疏論階專權蠹國狀復以先帝建儲階執不可誣之併劾李春芳聲勢相倚有旨切責康妄言于是科道陳瓚歐陽一敬凌儒張價等交章劾康為拱門生聽其旨授宜置之法大理寺丞海瑞言階自執政以來憂勤國事休休有容有足多者而康乃甘心膺大搏嗜善類其罪又浮于拱上納之降康二級外調○大學士高拱引疾乞歸許之時諸司攻拱章日數十上乃引去○六月詔起殷邁為浙江副使提督學校先是邁以南京文選郎出為江西叅議乞休不允已擢貴州督學副使未上而疏請致仕邁性恬退至是用薦者言召起視學兩浙掄士一先德行未幾遷江西叅政○詔議禮部侍郎薛瑄新建伯王守仁從祀時禮科給事中趙軌御史周弘祖請以故禮部侍郎薛瑄從祀孔子廟庭耿定向亦請王守仁從祀下禮部議

尚書高儀覆言薛瑄相去百年輿論共服王守仁尚近猶恐衆論不一宜會官集議以俟聖斷上是之○秋七月辛酉金星晝見○賜羅洪先謚文恭楊繼盛謚忠愍詹繼盛子應尾為國子生○給事中王治奏翟廷玉馬尹乾沒內府金乞罪之上報可而以事屬司禮監治之○詔謫太常寺少卿周怡外補怡疏陳定君志以修德業語多譏切內監上怒其抗違落級外調○八月朔上幸太學先是禮部謂舉幸學之典至是駕幸太學釋奠于先師孔子賜輔臣羊酒鈔錠有差○詔加贈彭澤為少保謚襄毅何孟春為禮部尚書謚文簡楊最為副都御史謚忠節○詔復王忬兵部尚書時山東副使王世貞上書訟父忬之寃詔復忬原官○遣武英殿大學士陳以勤祭先師孔子時秋丁祭也○上御經筵先是大學士徐階請經筵講學令使勅行既而命大學士張居正同知經筵事至是先御文華殿日講次日始開經筵○皇子千秋

節 上御皇極門文武群臣致詞稱賀○虜犯永平時虜犯永堡攻昌黎縣城幾陷引而西將窺滦河兵部議調兵入援久之未決虜厭飽自退黃台吉踞伺近邊令騎四掠○詔兩廣總督譚綸入京兵科給事中吳時來言請召綸及總兵俞大猷戚繼光來督練邊兵以省諸鎮徵調之擾部議大猷才宜于南往者曾試于北不效且近衰老綸與繼光惟上所用上令召綸入京○吏部議卹先朝言事諸臣以光祿寺少卿馬從謙戶部員外申良給事中周達常泰清紀郎周鈇上請 上怒不許部復引例執奏亦不許給事中王治御史龐尚鵬上言馬從謙張達常泰皆謫戍周鈇編氓申良杖死或以大禮或以大獄或指斥時政力持國是無非為宗廟社稷計今雖死填溝壑而孤忠勁氣豈容遂絕于生成 上以從謙所犯比子罵父例終不允惟贈申良為太常少卿張達常泰周鈇俱光祿少卿先是從謙以劾中官杜泰得死部臣首謀

卹錄故中官沮之○命太監陳學棟木于真定郡佐毋得參預故事渚沱河設稅課司以通判主之歲終以內臣印烙正德中奏差內臣民困稅耗嘉靖中專委府貳商民稱便至是李芳奏薦陳學可任吳時來力爭其不可不聽○諭幸天壽山不果 上欲詣天壽山行秋祭禮大學士徐階上言累朝舊制祭禮惟太廟親奉其山陵止皆遣官重社稷也及今東西二虜日夕窺伺勦遼宣大警報屢聞皇上顧欲冒危而往竊意祖宗在天之靈亦不樂有此行也 上不允階復言天壽山之後即黃花鎮黃花鎮之外即虜地今據邊報東虜土蠻等欲犯喜峯口西虜把都兒等欲犯古北口此係豈輕小者臣等計度利害實不敢以國家之事輕試于危險 上乃悟而止○詔復監生試卷卅字號先是南畿督學御史耿定向建議監生試卷革去卅字號于是北監中式者浮于制額數倍考官則以制裁之南監損于常數過半時中允孫鋌諭德王

希烈主應天試監生伺出謁聖遮道而譟辱之事聞司業金達等奪俸而罪出首禍者數人詔編皿字如舊○九月諭令太監坐團營尋罷之先是太監呂用高相傳旨令坐團營提督兵部尚書郭乾言官有定負不用內侍 上仍命草勅與之禮科給事中歐陽一敬孫枝御史韓君恩等各上疏言團營裁革已久亦無可坐乞追寢前命 上怒曰何物小吏乃敢抗違詔示徐階階等復極力言團營起于景泰嘉靖庚戌虜薄都城戎務大壞始革團營撤去內臣事權歸一數年來漸有成效若用內臣必且盡變先帝之法 上乃命罷○諭內外臣工各陳理財之策先是 上問戶部京帑所貯金存者幾何以贍軍國足備幾何年尚書馬森覆奏太倉銀庫歲入僅二百一萬有奇歲支在京俸祿糧草一百二十五萬有奇邊餉二百三十六萬有奇各省常賦諸邊民運今年詔蠲其半以出入較之共少三百九十五萬有奇昔謂國無三年之蓄

國非其國今查京通二倉之粟七百餘萬石以各衛官軍月糧計之僅支二年歲漕四百萬石內除撥餉鎮空連班軍行糧外實入二倉者三百四十九萬逋負漂流歲更不下二十餘萬石改折湊補別用不預焉欲為三年之蓄不可得况六年九年乎因條上目前所急奏之 上大駭曰軍儲缺乏一至是乎朕一切服用正供外未嘗妄費纖毫卿其悉心經理無忽至是奏請令中外臣工各陳理財之策又奏差御史馬明謨趙岩譚啟張問明等分查天下軍需贖羨以補元年所蠲之數從之○大學士郭朴乞致仕許之○虜酋黃台吉寇莊浪靖虜諸處○俺荅入邊駐牧攻破石州城知州王亮采死之殺人五萬餘縱火焚廬舍三日不絕復攻汾州破莊堡十七所細載徐歸官兵屯駐太原虜去掠取斃虜及殺土民避寇者報捷以聞既而 上日講畢問大學士徐階等以石州陷故諭令選將調兵加意防守兵科給事中魏時亮因上言陞

下憂及虜寇而日講後又問輔臣以石州事仰見加意勤政願益推此
心遠法帝王無怠無荒近法孝皇召問大臣則虜患不足平吳時來亦
言聖情留意邊防更望召吏兵戶部以督撫得人若何錢糧接濟若何
防守定計若何庶令當事臣工人人惕厲 上皆嘉納之○冬十月甲
申金星入南斗○諭輟經筵日講時司禮監傳旨天氣漸寒命輟經筵
日講大學士徐階疏言先朝故事弘治元年十二月二十五日輟講
嘉靖元年十一月二十五日輟講今天道尚未嚴寒視前日期則為
太早宜以聖學為重祖宗為法有旨報罷○工科給事中馮成能疏議
新河言臣從新河來相度南北地勢可慮者三其一新河自南陽而下
至鮎魚口與三河口地形俱高水以平流積滯之故漫溢四野致奪樹
藝之地又諸閘半就淹沒而長堤崩潰未已此上流之患可慮者也其
二三河滙萬流以西注既湍悍難治而其下達河猶高屋建瓴衝突

彌甚故沙泥填壅之區涉則懼衝旱則懼洩此中流之患可慮者也其
三下村以南諸閘水勢高下相懸幾及千丈啟閉之節畜洩為難此下
流之患可慮者也此上三患皆由三河地既居高水復平流雖目前告
成宜逆為未然之備 上以其疏示尚書朱衡令熟計以聞○詔削禮
科給事中陸鳳儀籍為民時鳳儀疏誤遺落聖旨故也○土蠻掠永平
時由界嶺口羅漢祠入永平大肆剽掠半皆朶顏三衛夷人○虜寇薊
州殺叅將吳昂既而黃台吉寇偏頭關 上怒命逮繫鎮巡劉燾王之
誥并逮副叅將田世成等訊治○召戚繼光入京協理戎政令薊遼總
督劉燾回籍聽勘○諭令臣工各陳禦虜之策 上諭閣部東西二鎮
虜寇殺掠至甚防禦之策何在卿其與文武臣僚商確以聞○兵部尚
書楊博因上言狂胡匪茹分道憑陵東犯薊鎮則九重震蕩西犯偏關
則三晉騷動今按各邊地勢既殊戡守互異薊州昌平保定三鎮有牆

可恃但乘高據險匹馬不入即為上策宣大遼東山西四鎮無墻可守
難保不入但堅壁清野使虜無所獲即為中策薊昌合聽督臣修補邊
垣分兵戢守宣府山南東路咫尺昌平四海冶盆道入達嶺皆賊徑所
由宜統重兵以衛陵寢鴈門寧武偏頭均山西門戶鴈寧外倚大同而
偏頭西連延綏獨當虜衝邊長八百餘里兵不滿萬故科臣議撤擺邊
止令居中相機戢守保鎮紮荆倒馬龍泉頗稱天險蔽以宣大必偵虜
南窺洪蔚然後乘墻拒守大同外與虜鄰先年總兵梁震每伺虜入寇
輒令勁兵搗巢虜畏之今用此可以禦虜遼東一鎮濱海鄰夷中通一
線之路兵食咸仰本鎮地腴收稔惟墾荒墾積足以稱雄矣○賜原任
兵部尚書翁萬達謚襄敏兵部左侍郎陶諧謚莊敏吏部左侍郎董玘
謚文簡○吏科給事中陳瓚追論殺沈鍊之罪先是嘉靖中錦衣衛經
歷沈鍊上疏請誅嚴嵩謫保安州為民嵩與世蕃深啣之會楊順總督

宣大嵩屬順殺鍊適虜犯大同順妄殺被擄者冒報首功鍊為詩刺之
有白草黃沙風雨夜冤魂多少覓頭顱之句順恨之遂為巡按御史路
楷誣以交通妖賊竟坐鍊死士論冤之後嚴氏敗鍊尋以遺詔獲勳璫
遂追論順侵匿賑銀及邊儲銀七千兩賂楷共殺鍊鍊子襄亦為父訟
冤廼命逮順及楷雜治坐交結近侍律斬○十一月有事于南郊時冬
至上親祀天于圜丘奉皇祖配祀畢上御皇極殿百官行慶成禮
○十二月詔賜故禮部侍郎何瑋謚文定追奪大理鄉朱庭立刑部侍
郎傅潮官給事中王治言故禮部侍郎何瑋理學純臣宜加美謚原任
大學士夏言所論復套事未為失策與曾銑均屬無辜宜與雪宥大理
寺卿朱廷立刑部侍郎傅潮鍛鍊夏言曾銑之獄宜追奪其官詔謚瑋
文定傅潮朱廷立俱追奪本職○甲午流星隕時有流星如盞大青白
色自中天東行尾跡有光長二丈餘○賜故戶部尚書太子少保徐問

謚莊裕○詔復吏部尚書萬鏗等官江西撫按任士憑蘇朝宗奏言世宗朝吏部尚書萬鏗以諫進百花酒為趙文華誣奏褫職右副都御史江潮以勘問妖犯李福達劾奏武定侯郭勛罷御史郭弘化以諫採木採珠削籍御史王時柯郎中胡璉主事余禎並以議大禮廷杖璉禎杖死時柯編伍遵奉遺詔以請上命俱復原職加贈○詔令鄭王厚烷復國先是嘉靖中王諫事玄削爵錮高牆至是冷復國加祿米四百石○甘肅天鼓鳴自西南而東北經時方止○瓊州賊李茂等作亂知府王可大撫平之先是茂等萬餘人船千餘艘為寇累年眾議欲勦之可大以為宜加招撫言不撫而用兵須數十萬金殺傷兵民以千萬計累年月不解又未必決勝烟濤迷茫兩舟對揖不可見急之即遁入大洋經赴島夷緩之復來我舟一遇颶風立碎果欲勦之必如國初將思樹功兵不畏死更得天時乃可得志不然不如撫之便也乃出招撫茂等

果聽諭待命後復屢為地方出勦他寇郡之東偏恃以無恐

戊辰隆慶二年

春正月辛亥朔京師江浙大風揚沙白晝晦冥○江南訛言命選宮女時傳朝命內臣選宮女于各省每三十女以一寡婦領之于是民間室女孀婦競求婚配多務苟合有司知而不禁說者謂元至正丁丑及正德間嘗有此異或以為恒風之應云○甲寅金星晝見○進禮部侍郎殷士儋為尚書掌詹事府事○加工部尚書朱衡太子少保出督河漕○詔進大學士陳以勤武英殿加太子太師吏部尚書○詔裁增加粳米及青白鹽太監李芳請裁損近年所加白粳米四千五百石青白鹽三萬斤仍令二年後悉遵弘治間例上加其節費惠民允之○上享太廟時孟春當享太廟上命成國公朱希忠代行禮大學士徐階等上言祭祀國家大典春祭四時首禋皇上必躬奉裸將而後為孝為敬

祖宗列聖亦必得皇上之躬親對越而後來格來歆且自宮至廟其路
不遠獻奠有數其禮不繁夫以宗廟之重雖勞且不當避况非甚勞者
乎請聖明親詣太廟行禮從之○浙江會城灾焚室廬舟楫數千計○
詔停止乙真人名號奪其印止以裔孫張國祥為上清觀提點○光祿
寺請裁羊房官吏軍士不聽先是永樂時尚膳監有羊房景泰中移之
西琉璃廠牧地十三頃司牲官吏軍士歲費數千金至是請以羊入本
司而裁革冗員太監孟冲爭之竟從冲言○禮部尚書高儀疏請建太
子許之先是上初即位儀即請冊立皇太子 上諭皇太子尚幼當先
賜名而後冊立至是復請引宣德成化弘治間冊立皇子皆二齡六齡
事例為據言皇上篤生元嗣已踰六齡岐嶷英哲茂異曩時奉諭以來
又已踰歲早宜諭誨以廣聰明給事中張鹵等亦上請 上命擇日具
儀以聞○勅命太監織造命李佑督織造于蘇杭工部尚書雷禮等言

初奉明詔取回督造內臣中外傳頌聖德詔墨未乾制使復出殊駭觀
聽乞罷佑勿遣第令所司如式以進毋渝大信而損儉德 上曰已有
成命趨典佑勅言官言內臣聲勢尊重有司阿奉渝禮必致大擾東南
民力疲困其何以堪乞如部議便不聽既而太監陳洪奏以龍袍紬紵
行令督造禮復言前遣李佑計不下四十萬金民力已竭今復加以六
十萬金民何以堪 上乃止○詔廷杖戶科給事中石星令削籍星疏
陳圖政理以慰人心言陛下入春以來天顏漸癯視朝漸稀章奏頓闕
逸遊屢肆因條上六事一曰養聖躬言養之之道以節飲食寡嗜慾為
要陛下為鰲山之樂縱長夜之飲耽聲色之慾萬一起居失調聖躬虧
損悔將安及二曰講聖學言經筵久輟屢請未復乞及時舉行使聖學
日就于光明三曰勤視朝言正月以來視朝稍倦恐奸諛之徒迎合聖
意以先朝二十餘年不出宮闈天下晏然欲陛下效尤則大不可矧世

廟賓天之詔亦追悔朝講之廢陛下若不加勤勵何以保厥有終願日出視朝以周知民隱總理萬幾四日速俞允言陛下降旨有允不允不允者固未審何如而允者亦違常期言涉聖躬則留中不下事干內窞則稽遲不行甚且因而獲戾尋常章奏稍緩猶可虜報軍機呼吸之變稍涉遲緩禍且不測豈愚言拙計無當聖心抑左右內臣抑遏章奏不使達于聖聽耶五日廣聽納言陛下求諫未幾少卿周怡一觸忌諱而謫外給事中陸鳳儀偶遺聖旨而削籍誠使二臣俾還舊職則忠言至計日陳上前六日察諛譖言方今公道昭明諛說間有頃緣內臣專擅言官攻發切齒中傷言或過直則曰此人欺陛下言或過激則曰此人慢陛下願深察其奸悉置不行則保全善類而天下稱明疏入上怒以為惡言訕上無禮命廷杖之黜為民時上御五鳳樓潛察杖者而中官戒閹吏毋納給事從人部郎穆文熙恐以杖斃先以義白緹帥身

自掖蔽中官共言之文熙且言且掖以出得不死王嘉賓疏救不報○命吏部右侍郎兼翰林學士林燠為日講官祭酒王希烈編修王錫爵為經筵講官○兵部左侍郎鮑象賢卒贈工部尚書象賢歛縣人豁達多大畧為湖廣僉事以獲盜功進兵備又進巡撫陝西及巡撫雲南平夷那鑑之亂提督兩廣勦捕山寇斬獲幾二千級以功陞一子入太學士論稱之○二月上耕籍田○禮科給事中張鹵請誨皇子言皇子方在睿齡外庭講讀事尚有待惟內侍之臣所係尤重宜勅司禮監慎選左右口授書史陳說民情利害動作舉止必專以正他日親賢講學基命成德之助端在於此上是其言○會試天下舉人命吏部尚書建極殿大學士李春芳禮部尚書掌詹事府事殷士儋為考試官取田一儁等四百人○議舉邊才先是論諸臣薦舉邊才至是戶部尚書馬森吏科給事中王治御史王友賢各有奏薦吏部尚書楊博上其議

因言五方之氣雖別于因材而百中之能難損于器使如往者輔臣楊一清以南人用之陝西尚書王驥以北人用之雲南俱有聲績宜勿論南北資格斟酌推用務當其才 上深然之○詔起趙貞吉日侍講讀貞吉時年六十餘而甚壯議論侃侃上屬意焉未幾遷南京禮部尚書以吏部侍郎林懃代之 上一日手詔諭輔臣調懃南京召貞吉還為講官添註詹事府與殷士儋協管府事已而士儋以府事讓貞吉不允○上詣天壽山展謁諸陵諭輔臣曰朕躬謁陵寢始知邊鎮去京切近如此薊州總督官來朝言近日虜情何如今邊事久壞無為朕實心整理者但逞辭說弄虛文將來豈不誤事御等即以朕諭傳示宣薊二鎮諸臣于是兵部尚書霍驥言薊鎮藩屏于東宣鎮股肱于西為京師左右輔但邇來或文武互為參商或官屬自相矛盾即當移檄二鎮多方偵伺務令預得虜情早為經畧其仍蹈故習者罪無赦 上是之○三

月復故尚書毛伯溫原官○冊立皇太子 上御皇極殿傳制冊立皇子 為皇太子太子貴妃李氏生也頒詔天下覃恩赦罪海內稱慶○總督漕河工部尚書朱衡疏陳治河事宜因條為八議復言漕運之弊皆由於用不得人疏入詔下所司○新城縣空中迅雷如雷○懷慶府天鼓鳴○遵化縣冰雹如鷄子損麥○廷試賜羅萬化黃鳳翔趙志舉等進士及第出身有差○上幸南苑先是諭兵部以是月二十六日幸南海子扈蹕止用京營官軍無煩冗費大學士徐階等上言聖駕行幸事體重大上林苑海子雖設自先朝然止畜養兔鹿非如視學耕籍有闕治理不足以煩臨幸且陵祀圜鑿未久不宜復出願賜停止不允初 上因左右有言南海子之勝者欣然欲觀及至荒莽沮濕宮館敝壞亦頗悔之遽命駕還○京師地震禮部尚書高儀等請令百官修省仍勸上親賢遠奸講學勤政以逸欲為深戒以勵精為遠畚詘粉飾之

虞文崇交修之實政 上是之○夏四月承運庫火累朝寶器皆燬○
萬全衛白晝晦暝水雹紛擊牛羊皆死○諭遣買金尋罷之時 上令
太監崔敏取戶部庫銀六萬買金萬兩進用戶部尚書馬森言先帝時
買金二千日積月累僅能足數尚不足色尋詔停止以此金暫貯太倉
今欲于數日之內計滿一萬之數臣知不能也且祖宗時御札皆下閣
臣轉示各部院無司禮監徑傳者更望率由舊章以示崇重命令之意
上乃止○陝西地震給事中何起鳴奏西安府地震如雷平起仆遠
望城郭灰塵蔽天垣屋欹側至涇陽咸陽高陵城無完室因陳納諫恤
災邊防守令實政聖德六事乞蠲二年稅糧報聞御史周弘祖因上言
各省地震有聲裂為溝渠水溢泉湧旗竿數火天鼓再鳴隕星旋風天
雨黑豆臣以地陰也以安靜為德水亦陰也以順下為常洪範傳曰人
憤怒則水湧溢翼奉曰極陰生陽不旱則火胡氏春秋五石隕宋緣皇

上即位二年未嘗召見輔臣延訪治道虜患孔棘備禦無方事涉內臣
遂多撓阻點馬則免清查則免皇莊則親收子粒太和則權取香稅織
造之使屢遣糾劾之疏留中皆足以招災異者疏入不報○五月薊遼
保定總督譚綸疏陳邊務言遊兵破虜誠為制禦長策而行之有四難
制虜長技非車不可召募強壯歲費甚多司農告匱一難也燕趙之士
自備虜以來銳氣幾盡募卒吳越又疑用之不可比散之不可南二難
也燕趙之人素驕驟見軍法不無大駭且去京甚近流言易生三難也
我兵素未當虜戰而勝之虜不心服能再破之終身創矣第懼忌嫉易
生奇禍或至四難也不若姑就薊鎮見兵講求戰守之策各路選兵十
枝每枝務足三千列為三營營分三軍各加訓練仍付戚繼光以督理
練兵之職每春秋兩防三營之兵各移近邊臣與繼光往來督勵務各
負墻以戰遇之邊外此為上策萬一乘墜潰入亦願少追罪誅臣等決

一死戰收桑榆之功亦不失為中策若先事不能禦後事不能戰掩取微功苟圖塞責是謂無策又言中國長技無如火器欲練兵三萬人必得鳥銃手三千人為衝鋒而時加肆習非遲之一年不可今防秋期近請選取浙兵三千人以濟一時之急請上裁擇從之既而復條上分立三營事宜言春秋兩防之時各屯要地如永平有警則遵化一營禦之三屯出二哨應之密雲出一哨應之密雲有警則密雲一營禦之三屯出二哨應之遵化出一哨應之兵皆據牆為戰以拒虜不入為上功其或一面失守致虜潰入則合三營之兵併力奮擊務收全捷又言薊鎮專用主兵將以罷調客兵今行之而未效者任未專也宜責臣綸與戚繼光使專董其事勿使巡按巡閱挽與其間俟三年補練有成然後遣官閱視補得主兵幾何即罷調客兵幾何疏入報可○上御經筵日講○山

西男化為女巡按山西御史宋纁奏言太原府靜樂縣民李良雨娶妻數年以不和離異後或卧病遂化為女經脉行流與本村民白尚相奸配其弟良雲以事上所司謹疏以聞○六月浙江福建四川陝西淮安鳳陽等處大旱○京師河南河東宣府馬韋堡諸所皆大雨雹夜見火光南京給事中張應治以災異頻仍條陳修弭七事曰勤政親賢立信足兵食平盜賊復軍儲察幽枉大意言天心仁愛人君禳災不當專責臣下而前三議勸上革內批罷遊幸召還織造內臣語甚切直上意頗不懌○秋七月詔申飭屯塩之法時御史馬明謨疏陳四事一嚴徵賦之期二覈叩存之數三重侵冒之罰四復屯塩之舊戶部尚書馬森覆言四事俱當如議其屯塩一事謂屯塩之法寢不如古者蓋祖宗朝邊徼振舉虜不敢入開墾塞下輸納塩糧當時不籍內帑而公私饒富今諸邊歲歲苦虜塞下既無可耕之田塩商又無可糴之粟當事者乃

議發帑銀開餘鹽以佐之于是屯政迄不可復而鹽引滋滯夫京師天下根本內帑國計所關以天下供京師其勢順以內帑供四方其勢逆此復屯塩之利誠永久之圖近已勅重臣分理其事宜申飭之務底成效詔令行之○詔治內使粹擊御史之罪時內使許義挾刃嚇財巡城御史李學道執而笞之其黨謹諱不平是日朝罷內使百餘突出左掖門外粹學道奪挺擊之踣地幾斃舉朝相顧錯愕上聞之大怒命錦衣衛執首禍十餘人杖一百遣戍烟瘴餘各杖六十戍孝陵學道亦以擅笞內使不諳事體外調○大學士徐階致仕時兵科給事中張齊論劾階不職狀上以齊肆意詆誣姑調外用階上疏辨上令即出視事階復上疏乞休許之燕勞錫予如楊廷和故事加優○八月降虜人率衆來降初大同人丘富入虜中教為城堡宮室布滿豐州川名曰版升以居中國被擄亡命之衆每入寇輒令前驅為嚮道邊民苦之

即位初詔懸賞格降人應募者以千計時白春魏良相田汝光等已各有部落畜產聞令乃率衆來降命授附近衛所百戶賞銀五十兩仍懸賞格于邊外九邊皆如例○詔進大學士張居正武英殿居正疏條六事上之曰省議論振紀綱重詔令覈名實固邦本飭武備疏入上曰卿奏深切時務具見謀國忠懇該部院勘議以聞○九月諭買貓睛珠寶尋罷之給事中魏時亮上言貓睛無用之物一顆之價動至百金孰非生靈膏血天下旱荒不言賑恤胡虜方強不言防秋乃急急于珠寶之妄費似為倒置上命罷買○詔江北屯塩都御史龐尚鵬總攝九邊屯塩時給事中魏時亮御史王家賓請召還清理屯塩都御史吏部尚書楊博會戶兵二部議言在江南山西二處可罷在江北不可罷宜將九邊併歸江北屯塩都御史龐尚鵬總攝而各省責成撫按自行清理從之既而尚鵬條上屯田四事曰開墾拋荒清理侵占查復原額追

徵子粒詔悉如例○工部尚書雷禮致仕禮上言部中錢穀已經奉詔節省而為太監滕祥所持危言橫索事事掣肘頃以傳造厨櫃擅加徵發費以巨萬而工廠大木斬截任意臣力不能爭徒增憤惋今嫚際既成事體相悖乞賜罷以全國體 上不悅令致仕去○十月南京工部尚書魏尚純卒尚純鈞州人耿介有風節中州士人咸稱之○召總督漕河工部尚書朱衡入掌部事○十一月詔逮繫聞住太監李芳下獄監錮待決先是芳數以直諫忤旨 上惡之諸閣亦共恨其正直短于上前故命錦衣逮繫刑部尚書毛愷奏言自昔聖王刑人于市與衆共之非直使死者服罪不寃且使生者將懼死不犯耳芳供事內庭日夕一旦坐死罪狀未明臣等皆莫知所置詰非所以示天下公安左右心也疏入 上曰芳在內事 上無禮第命錮之○十二月奉安世宗肅皇帝神主于太廟○給事中李已請罷斥尚衣太監崔敏不聽時敏以

急缺年例黃金奉旨嚴徵以進已因上言崔敏獻諛希寵蓄詐孃奸假公用以充私橐積財貨以奉私求誤國欺君速宜罷斥不報○禮部類奏災異禮部尚書高倬上言今歲四方災異比往年特甚山西天鳴地裂男子化女浙江水旱尤為異常宜痛加修省 上曰朕夙夜兢惕不敢怠荒爾臣工務實心體國共圖消弭以仰承仁愛之意

已巳 隆慶三年

春正月乙巳朔○原任兵部尚書趙大佑卒大佑浙江太平縣人博大和雅勤習政事歷官中外俱有能聲 上改元初言官咸以德器才猷足堪重任薦而大佑病革不起時論惜之○詔獨任總理練兵都督戚繼光時繼光上疏薊鎮兵多亦少之原有七不練之失有六雖練無益之弊有四又言兵形象水水因地而制流兵因地而制勝薊之地有三平易交衝內地百里以南之形也半險半易近邊之形也山谷彘隘林

薄翁翳邊外之形也虜入平原利于車戰虜入近邊利于騎戰虜在邊外利于步戰三者迥用乃可制勝邊兵所習惟馬山戰谷戰林戰之道唯浙兵能之願予臣浙兵三千戰守又以三千烏銃手付臣教練分發十區聽臣總領車騎合練庶臣得展布而無掣肘之虞部議宜取田總兵郭琥而獨任繼光 上是之○內官監火監監以製煙火延熱房屋御史劾奏不聽○太監滕祥孟冲陳洪各廢弟姪為錦衣指揮及千百戶凡二十人○禮部尚書高儀請皇太子出閣講學 上命待十齡後行○提督京營戎政鎮遠侯顧寰引疾乞休不許時寰以老疾乞休兵部尚書霍冀等議大閱在即功罪方明寰享大將之榮十有五年而一旦求去且副將叅佐諸人俱待 皇上別白以彰勸懲孰敢自便其私上命寰策勵自效不允所辭○工部尚書朱衡請察監局之費言朝廷供應皆小民脂膏內外諸臣不思得節日事朕削臣等目擊時艱不

敢不更相戒飭為國家守財至于內府監局一切徵派浪用則在皇上親發訓辭俯容臣等隨事執奏庶宮中府中俱為一體而國用民命兩有所賴 上從其言○戶部尚書馬森致仕召南京戶部尚書劉體乾為戶部尚書時森以母老引疾求歸故召體乾代之○御史詹仰庇請復皇后正位中宮時仰庇入朝遇醫官自禁中出言皇后遷于別宮寢疾危困仰庇上疏言天子之有后正位六宮之首今皇后殿下乃先帝所擇以配陛下為宗廟社稷主臣昨聞道路流言皇后移居別宮已近一年抑鬱成疾皇上畧不省問臣實痛之臣謂人臣知而不言當言而犯忌諱俱當死願一聽臣言復皇后于中宮時加慰問則臣死賢于生多矣 上曰后侍朕久無子多病移居別宮冀稍安適暢意樂心耳爾不知內庭事體乃妄言即仰庇復疏言皇后乃先帝擇選以遺陛下有闕睢之德樛木之賢脫簪待巷之規陛下為綱常主而使聖后抑鬱成

疾已為不可乃云別宮暢意豈有夫婦睽違而暢者乎睽違日深抑鬱日甚疾何由愈 上曰后疾愈即還宮毋多言姑不究初仰庇疏上衆謂禍且不測仰庇亦自分重譴及命下中外聞者翕然稱聖德云○二月南京國子監祭酒姜寶疏陳飭監規以廣聖教八事一言修理傾毀舍宇二言督徵各處膳銀三言請罷納粟事例四言催取舉人入監五言請復國初積分之法六言儲養公侯伯子孫七言處補分教屬官八言查復本監見部舊例及卹助監生部議覆從之○駙馬都尉鄔景和卒景和尚永福長公主性恬雅好文嘉靖間多待衛功後以表賀聖節忤旨奪爵為民隆慶改元詔復原爵侍衛前為民時居崑山十餘年被服儒者士論嘉之及召用時為上稱引祖宗故事多見採納○三月詔以內局花樣行督造李佑織進計一千八百疋部言初遣李佑已悖新詔復發花樣財力何堪科臣亦力爭不聽戶工二部臣因請自嘉靖四

十四年至今歲造未完并未織者改織新樣從之既而陳洪復請督造上亦是之御史賀一桂劾洪惑上病民年利乞速斥之不聽○詔治鳳陽守備太監趙芬罪時巡按鳳陽御史劾奏芬貪酷驕僭乞下吏訊裁其負勿設便部請下御史先繫治其黨會議去留從之○庚午土星逆行犯太微垣上將星給事中吳時來上保泰九劄時上既免喪猶不親政時來乃上九劄一曰戒懼言天命人心去留無常視朝宴息悉宜敬畏二曰端蒞幸皇上好遊何不召輔臣同遊講學議政以通下情三曰戒嗜好聲色寶玩最易溺人小人借以固寵人主因之喪邦四曰發綸旨視朝御政一發皇言庶幾臣子知所惕勵五曰習奏事祖宗朝設寶座于會極門遇有章奏面陳批荅今宜漸習以練政體六曰嚴票旨自七月以來旨多舛謬皆云不經睿思不由閣臣中外駭異宜專責閣臣內批未聽彼執奏七日慎傳奉昨太和山事旬日間六更明旨必

有舞文之徒假以行私宜令一切傳奉皆補本覆奏以防奸偽八日弘
虛受謂臣下建議當虛心以聽有優容無罰謫九日禁誣指小人欲害
君子必誣以違抗指為誹謗不可不察以安善良報聞○四月諭選宮
女 上諭禮部祖宗之制宮中設六尚以備內治其選民間淑女十一
歲至十六歲者三百人○命大臣分督屯田一往江北蕪山東河南一
往江南浙湖雲貴一往河東蕪四川諸省後以無功罷之○諭戶部取
銀進用時取銀三十萬兩戶部尚書劉體乾上言銀庫見存止三百七
十萬九邊年例當發二百七十六萬有奇在京庫糧商價不下百萬有
奇薊州大同各鎮例外奏討不與焉蓋發庫銀猶不足用若復取三十
萬經費何支乞且停止不聽因復奏此存庫之數乃近差御史搜括所
入明歲且無策矣臣不足言如國事何戶科給事中李已御史傅孟春
等交章乞如體乾言大學士李春芳陳以勤張居正亦上疏欲于內庫

取用 上曰卿等所奏已諭且取十萬以濟急用不必再奏○五月大
水時江以南霪雨三月不絕田禾漂溺所司俱以蠲賑請而淮揚徐州
俱被水患守臣奏請發運司餘銀三萬兩鈔關艇料三萬八百餘兩鹽
院贖贖一萬八千六百餘兩河道二千三百餘兩司府州縣贖贖二萬
五千餘兩兼積貯勸借買穀十五萬石截漕三萬石以賑之○詔廷杖
御史詹仰庇奪其官時仰庇上言陛下前取戶部銀在廷諸臣將謂充
足內帑以備緩急乃盡以供造鰲山修理宮苑花欄龍鳳船鞦韆架堅
櫃玉盤之費使群小因而乾沒為聖德累不小伏願念生財之有限思
國計之甚難毋作無益以害有益近侍之臣或以織造採辦玩好逢迎
者悉屏出而深罪之以章聖斷 上怒責仰庇累次不悛命錦衣逮治
廷杖一百為民大學士李春芳等言仰庇疏意止以內官監錢糧未明
欲行請查以資國用心本無他乃杖之朝堂視其官職似為少重九卿

楊博等亦言恐四方妄疑陛下為中貴洩忿過歸陛下疏入俱報聞○禮部郎中戚元佐疏上宗藩之議言諸藩日盛祿糧不足當及今蚤為區處因擬五事上請一限封爵二議繼嗣三別疏屬四議冒費五議擅婚疏下禮部尚書高儀言元佐所奏鑿鑿可行但事体重大仍行各王府虛心評議以聞 上從之○六月召起汪宗伊為南京吏部郎中尋擢尚寶司卿○擢海瑞為右僉都御史總理糧儲兼巡撫應天等處○原任兵部尚書趙炳然卒炳然劔州人清勤練達巡撫浙江時會百姓新罹兵燹乃悉更舊令之不便者仍奏減軍需之半以業貧民浙人至今思之進轉本兵朝廷方擬大用以病歸卒于家贈太子太保謚恭襄○閏六月南京吏部尚書吳嶽疏陳六事一曰勤召對言經筵進講悉循故事無裨啓沃莫若時召近臣考論古今以期實效二曰限輪對言宜令部院堂官班立便殿依次面陳軍國事情以廣聖聽三曰容直言

言言官意或稍偏詞或過激宜少霽天威以倡敢諫之風而防雍蔽之患四曰崇節儉言邊方急用仰給司農一或不繼患生肘腋宜早宮減食為天下惜費不宜虛外庫以實內帑五曰正題覆言凡諸臣建議事有可行宜即為題覆不則明列是非毋持兩可以失事機六曰復執奏言祖宗朝凡內批下所司稍有干礙大臣即引義固爭務以回聖心而培主德疏入 上自採前四事以後二事下所司看詳左都御史王廷相言嶽疏皆係國體請發所司務實舉行報可○諭造鰲山燈尋罷之時 上命工部造朝殿掛燈及鰲山燈尚書朱衡上言灾異頻仍旱蝗水溢奏報踵至宜停興作以應天變又明年日月之食皆在歲正陛下方當撤樂減膳恐懼修省何暇為觀燈遊宴之舉即朝殿掛燈時不可缺亦因弊壞稍加修葺取資該監足矣今乃以一燈之費至三萬餘金柰為聖主儉德累何 上乃罷鰲山而令修葺其弊壞者○禮部左侍

即瞿景淳卒贈禮部尚書謚文懿景淳常熟人為入醇謹以學行聞精工時義與王鏊唐順之齊名士子宗之皆稱三先生云○巳亥金星辰見南方○詔諭求言給事中鄭大經上疏言災異疊見時事多艱正恐懼修省圖回幹理之日宜宣召大臣商確治道各率職條對及勅九卿言官并撫按臣講求用人理財事宜以聞給事中張鹵上言用人理財誠為急務願言不當實或反基禍夫垂綸者一日而協卜扣角者經宿而授政以知明而用當也乃促柱逼期知之不審偶據傳聞挾以意見按名登籍何以責實天下之財不在官則在民不加賦而上用足彘弘羊所以欺武帝也今國儲既虛民力亦竭妄持說不本經常道聽途說何濟實用乞勅臣工務秉至公勿事苛屑報聞既而掌詹事府事殷士儋上言傾緣災異疊見皇上俞言官之請詔命諸臣講求用人理財事宜臣願皇上于宣召大臣一事亟賜舉行則可以通上下之情消四

方之變此之不圖雖條對叢委封章山積何裨實用夫用人吏部職也考覈論薦聞見訪求臧否素定而不敢擅用理財戶部職也出納經常弊蠹源委動有成美而不敢輕革此其中必有掣肘之患非奏牘所能達者必宜召吏部令其面對凡實心任事輿論共賢者無問卑遠廢棄并許破格酌用宜召戶部令其面對凡沿襲舊弊當革浮冗無問官府織鉅並許清查釐正更召輔臣面賜商諮昔宋臣趙普薦人至裂牘補進太祖竟聽其言果得實用唐臣魏徵因宦者充外使多妄請請杜其源太宗曰非卿朕安得聞此語乃停充外使傳紀二君納諫以為美談比見吏部請錄用石星詹仰庇竟以報罷戶部疏奏太和香稅庫局舖塾等事即護訶譴是二部所陳且未蒙嘉納矧諸司臣庶人各一疏孰能適當聖心乎伏願優容骨鯁之臣如吏部之所薦講求約浮之故如戶部之所查宗社幸甚天下幸甚山西巡撫靳學顏亦上疏理財言周

之洛鎬漢之兩都皆屬空名而我朝兩都並建官卒叢集坐靡公帑一費也宋之宗室親疎有等散處民間通名仕籍今則出城有禁入仕無階不農不商坐食常餼二費也天下之兵曰邊兵曰京兵曰留都兵曰腹內衛所兵此四者坐食雖同而緩急則異其目曰見伍曰招募曰徵調曰清勾曰充發五者之中見伍招募不可已也清勾充發按冊可觀責效無實徵調僅資擺守徒費齎送至于山東義勇諸省民壯原非祖宗之制今供勾攝之司請徵其餉以實邊儲而京兵之不可汰者亦請責以輪番戍守之法又廣鑄錢之法以通融于五穀之外重積貯之令以盈虛于豐歛之間庶其恒足乎疏入俱下所司○八月以趙貞吉為文淵閣大學士入內閣辦事貞吉疏辭不允復于講筵陳謝上曰卿其盡心贊理貞吉復言近日朝廷綱紀邊方政務多有廢弛臣欲捐身任事未免致怨惟陛下主張于上臣不敢負任使以干明典上嘉之

○詔鎮撫司訊沿海戶王印罪時上林苑監海戶王印訐奏積書劉儒交通苑官大肆侵盜提督太監孟冲亦奏王印誑金曠役中旨下鎮撫司訊之遣印戍邊戶部尚書劉體乾給事中李己等皆請以事付法司不聽○九月詔舉邊才時諸司各以名上見任則楊魏等八十二人丁憂則都御史石茂華等七人養病則侍郎吳桂芳等八人部議俱宜以次擬用○河水溢自清河縣抵淮安府城西淤塞三十餘里決方許二壩出海平地水深丈餘寶應湖堤往往崩壞山東莒州剡城諸處水溢從直河入邳州人民溺死無筭總理河道都御史翁大立因上言濱河之民重罹水災皇上憫念下令蠲租發帑賑濟不勝大幸顧問闕窮苦之狀宮禁邃遠何由見聞臣謹繪圖以獻畝九十二一日水次兌軍二日運河築堤三日黃河驟漲四曰昏夜守堤五日糧船過河六曰黃河捲掃七日茶城撈淺八曰洪水衝城九曰風雨異常十日海潮嘯溢十

一曰災民被水十二曰糧船漂沒陛下省覽以圖險阻艱難民情在目寧不惻然且時事可慮有五一慮京儲東南財藪水溢不登鞭撻雖加徒隕人命二慮虜患邊鎮閔隘洪水衝激墩堡傾頽何恃以守三慮內地三輔諸郡霖雨城壞積貯空虛難防不測四慮海防海徼之間颶風鼓浪兵船戰士悉被漂沉五慮國課淮浙鹽場鹹泥盡衝團窳俱廢鹽課何出願陛下以此五患十二畝召公卿輔弼之臣面議經理畝田之術上留圖覽章下所司工部尚書朱衡因言水患如此宜及今脩築今河決草灣北合鹽河至海州入海亦可疏濬以殺水勢并行會勘從之○詔釋副總兵田世威叅將劉寶立功贖罪世威寶俱以山西石州失陷論死繫獄忽傳旨釋戍邊衛立功自贖兵科給事中張鹵等請仍付二犯于法司或明示以得釋之故上怒鹵贖奏奪其俸○詔改折蘇松漕糧時蘇常二府水災乃議改折漕糧常熟縣十分之五崑山十

之一宜與十之三詔許之○刑科給事中宋良生請覈御馬監耗財之弊不聽時良佐言輦轂之下耗財甚衆一謂牧馬勇士太濫二謂商人估價過當三謂草料侵冒太甚四謂牧馬地租多逋御馬監太監高相以良佐言非舊制請仍舊為便戶部以良佐言為可行上命悉如舊○上大閱先命英國公張溶祭旗燾之神乃大閱將士于京營老幼觀快咸稱曠典云○禮部尚書高儀致仕先是御史傳寵劾儀往事儀上疏言撰文叩壇原非正誼中宮還位累疏覆請隨奉明旨俟後疾愈還宮事在禁掖非外庭所能悉宗室祿糧奉旨行各藩府廷臣會議請自上裁上嘉儀端謹任事令安心供職既而儀四疏乞休至是始得允○詔謫御史楊松外補時尚衣少監黃雄以番休日私出徵子錢闔于市兵馬司繫白巡城御史楊松既而內監令校尉趣雄入直校詭以旨召松驗無實乃劾奏黃雄暴橫矯詔雄亦入辨上以松誣奏外貶司

官削籍雄發孝陵司香○戶部尚書劉體乾上太倉及各省歲發兵餉與本鎮屯糧之數初上問九邊年例軍餉太倉歲發及各省解納之數幾何體乾言防守士馬各鎮原自有主兵一鎮之兵足守一鎮之地後主兵不可守增以募兵募兵不已增以客兵調集多于往時而坐食者遂衆合用芻糧各鎮原自有屯田一軍之田足贍一軍之用後屯糧不足加以民糧民糧不足加以鹽糧鹽糧不足加以京運饋餉溢于常額而橫廢者日甚因以元年至三年太倉各省歲發兵餉及本鎮屯糧之數備造進覽○京師地震有聲○巡視京通倉儲御史楊家相疏陳倉儲事宜因條上三事曰清賦額關水利通錢法既而復條議漕輓便利十餘事上俱嘉納之○十二月庚子天鼓鳴上諭廠衛暗訪諸司之不職者上以災變頻仍多緣部院政事不調信刁濫訟假公營私致傷和氣廠衛暗訪以聞劉思賢上疏言廠衛暗訪係國安危昔創

西廠遂令汪直潛奪威福流毒縉紳先帝首鑒此弊一洗而更豈有不任股肱耳目之臣而任廠衛廝役之賤者乎且曰暗訪則跡多真秘事可虛誣疑似難明動罹刑辟重足搖手之禍將在今日後亦尋寢○召起禮部尚書吳山為南京禮部尚書○吏部尚書楊博罷時御史部承劾奏總理屯鹽都御史龐尚鵬心術狡猾行事乖繆吏部尚書楊博議覆言尚鵬才堪策勵宜留用上曰近來吏部專事掩飾為欺詐博乃自訟請解職遂令致仕去給事中嚴用和疏言博自筮仕乞今餘四十年數歷中外民事邊情靡不諳練及晉銓衡秉公守正以忠國家今以題覆小誤輒令休致既非所以存大體亦非所以孚公議乞留之令展所長不聽○召起大學士高拱以原官入閣叅預機務兼掌吏部事○詔廷杖尚寶司丞鄭履淳尋令削籍履淳上疏陳時政言四方多故萬民失業燕雲遼代中原之脊也而鼙鼓一聞三閩震動徐梁汴衛沃衍

之地也而洪波蕩析四顧無煙荆襄秦洛形勝之區也強梗憑陵而嘯聚浙直閩廣財貨之藪也奸宄剽殺而師勞宗藩之坐窘無籌中澤之哀鳴尤慘物怪人妖天鳴地震彗星兩見于女尾日月繼食于元春天心人事種種可駭正微臣痛哭流涕之秋皇上卧薪嘗膽之日也夫教教赤子聖主之資若不及今定周家桑土之謀切虞廷困窮之懼則上天所以警動海內者適已資他人矣今之最急莫如用賢陛下諒陰已三期矣曾召問一大臣面質一講官賞納一諫士以共畫思患預防之策乎竊慮高抗睽孤乾坤否隔忠言重折檻之罰儒臣虛納誨之功姬姜違脫珥之規周召拂同舟之義回詬屢懲趙普奚從補牘內批突出蘇轍何自封還善類失于振揚厲階啟乎闔寺言涉官府輒肆阻撓權在私門牢不可破迨其手握王爵口啣天憲風行勢協釁積黨成會使台輔具員九卿拱手元良愠悔于孤立百職斲首而奔命霜雖未冰月

已幾望前車不遠然豈在明萬議洶洶皆謂群小肆侮明良疎聞未有若是可獲永安者伏願奮英斷以決大計勿為小故所淆弘濬哲以任君子勿為僻昵所惑以美色奇珍之玩保瘡痍以昭陽細物之勤和庶政以變夷為閔門勁敵以錢穀為黎庶脂膏拔用陸樹嚴石星之流納取殷士儋翁大立等疏經史經筵臣民章奏必與所司面相可否庶萬幾之裁理漸熟人才之邪正自知察變謹微回天開泰計無踰此者疏入 上以履淳妄議朝廷懷奸生事命廷杖下刑部獄削籍為民

庚午隆慶四年

春正月己巳朔日食不受朝賀○諭戶部取銀進用內承運庫以空匱下戶部取銀十萬兩戶部尚書劉體乾上言京帑重寄乃以片楮取之不印不名安辨真偽 上復命如數以進○二月都御史王廷罷命大學士趙貞吉兼掌都察院事○兵部尚書霍冀罷先是大學士趙貞吉

言我朝內外衛兵分隸五府乃高皇帝定太平之計俾免強臣握兵之
害意至深遠今祖制大壞特設戎政府鑄印而授之鸞時事危矣請收
其印歸之內府有事則領勅掛印事完則繳勅納印庶大阿之柄上得
而持疏入令會議龔乃上疏言貞吉深鑒覆轍建議更制以收兵權不
為無見但今京營之制總之為三大營以統其綱分之為三十小營以
理其目兵柄不偏于一將軍法不專于一人有合操有分操有春秋閱
視之操有歲終考覈之操此正所當欽承無替者諸臣多謂京兵訓練
不在營制更張而在將佐得人操練如法是皆探本之論至謂大將不
宜專設戎政不當有印則防微杜漸議亦可行龔議營制既與貞吉不
合會給事中楊鎔論龔鎔為貞吉鄉人龔疑貞吉嗾之乃各上疏辨
上不悅責龔令閒住而慰諭貞吉○原任刑部右侍郎曾鈞卒鈞進賢
人端嚴廉正嘗劾奏武定侯郭勛大學士嚴嵩有直嚴居官垂四十年

始終一節卒謚恭肅○三月諭加造段尺尋罷之時尚衣監傳旨令南
京加造段尺十萬部科執奏宜令所司亟進原造之數即宮用不乏民
困亦蘇 上命加派者惟御用三分之一餘悉准歲造之數不必加○
復以郭乾為兵部尚書掌吏部事大學士高拱因言儲養本兵大臣自
司屬始但北則薊遼宣大等處而南則閩廣等處風土既殊事體亦異
本兵處分止憑奏報別無證據宜于數處之人各擇其有才力知兵事
者多則二人少則一人使為本兵司屬彼生于其地身家之慮既無不
周至于山川險易將領賢否士馬強弱與夫奏報虛實功罪真偽皆所
熟知可一問而得詔如議行著為令○巡按浙江御史周禧奉詔薦舉
邊才因上疏言論才者先人品而後事功取才者捐細瑕而觀大致故
高帝舍匿金之過資其奇謀文帝赦魏尚守雲中匈奴不敢南向何者
細瑕在所畧也鷹揚彫足之業蓄于渭水陰中而殺妻食子者功可嘉

而心不可測何者人品在當辨也故金車玉輅不以載馭則腐聚猶積
薪象尊龍瓚不以獻酌則污賤猶瓦噐方今人才竊有餘慨然汲黯在
朝淮南寢謀中國相司馬遼人相戒何者其骨鯁忠義之氣足以陰折
奸萌而耆舊老成之望可以風動四海今直慙之士犯顏批鱗委頓草
莽耆舊之碩非有大故亦漸相繼報罷有識者寧不寒心既舉已試之
材棄如振落乃汲汲然旁搜遠採有如建大厦濟巨川舍杞梓而別求
川澤之材察鯁餘而他覓舟楫之利未見其可也幸念汲黯司馬之臣
為國家輕重特賜召還疏上下吏部知之○夏四月京師地震○詔釋
尚寶司丞鄭履淳及內官李芳等于獄刑科給事中舒化等以熱審屆
期請釋繫獄鄭履淳李芳等三十五人時庾死者已六人而餒瘠者居
半詔釋為民芳等四人充南京淨軍餘繫如故○擢四川布政殷邁為
南京太僕寺卿時罔政寢弛吏因緣為奸邁隨事振刷不辭煩細未幾

請告還○御史邵陞議選將才上疏言請行各公侯伯應襲之子與已
襲而年三十以上者俱赴京營提督教以騎射韜畧并遴選中試武舉
及武學官生之穎出者相與淬勵之歲終巡視科道官察其有異等者
送部籍記以需將才之選 上從其議○五月外補科道官而以部屬
改補之○詔廷杖戶科給事中李已繫獄待訊削給事中陳吾德籍時
已與吾德疏陳節用因劾奏太監崔敏傳買年例金寶科擾紛紛請行
停止 上不允乃復上言陛下登極詔書停止採買蠲除加派海內歡
若更生比者左右近習干請紛紛買玉買珠傳帖屢下人情洶洶咸謂
詔書不信無所適從臣惟邊方年例奏發無時畿省饑荒求濟不已司
計之臣計苦無出奈何以一玩好之故而費數十萬之貲若不及今杜
漸竊恐將來效尤轉相欺蔽不至空人之國不已也 上大怒謂已沽
名犯上廷杖一百刑部問候黜吾德為民○六月詔治兵馬指揮李承

芳罪時北安門直宿校卒負一屍棄門外承芳疑有奸使收訊之辭連
內臣李陽春陽春乃先奏死者以生人入禁故令扶出承芳酷刑逼拷
誣執非辜 上遂釋校而罪承芳刑科給事中舒化請下法司不聽○
大學士高拱議重邊方有司上疏言邊方有司實兼牧民禦虜之責宜
擇年力精強才氣超邁者除補或查治有成績無通武事者調用以三
年為率課最者比內地加等陞遷或不次擢用不職者降三級別用或
罷出治罪夫既開功名之路以歆之于先又嚴降罰之條以繩之于後
庶乎脩職者多邊方有賴 上令加意擇人悉如議行○都御史葛守
禮疏議上兵言國初制虜內峙雄關外聯重鎮鞏然天府之固也自大
寧內徙京師遂露左肩所恃者朵顏三衛為我藩籬而夷情漸異嚮導
交通于是虜日窺邊登陴戍守遂無寧日始以倉猝至調陝西客兵謂
旋練土兵即當遣還今二十年矣土兵之練何在秦兵未遣而越兵復

來山東義勇又以防秋至豈土兵皆不可用乎宜倣唐土兵之制隨地
訓習以備戰守毋徒調掣為也章下所司○秋七月大學士陳以勤致
仕先是以勤疏陳六事上言臣因頃來多病乞骸骨歸但夙以藩邸舊
臣恩意至重不忍苟去願披忠獻議以補衮闕敢條為六事一日慎陞
擢二日酌久任三日懲賍吏四日廣用人五日練民兵六日重農穀疏
入 上嘉納之因四疏乞致仕 上溫旨慰留而請歸益力 上察其
誠懇不得已許之加太子太師給郵傳夫廩如故事復賜勅獎令其子
編修陳于陞送父還鄉○刑部尚書毛愷致仕以葛守禮為刑部尚書
守禮因疏請戒諭有司謹刑上言國家制例各有定則即罪大惡極眾
所共棄者猶問以刑部評以大理朝審以多官及至臨刑又三覆五奏
其重民命若此皇上停刑有旨執審有貸而諸臣無以奉承德意動用
酷刑有問一事未竟而已斃一二命者有到任未幾年而拷死數十人

者請行各撫按戒諭有司有仍前慘刻如故勘故禁故入平人致死者
依律抵死 上是其言令後有容隱者聽法司該科一併參治○戶部
尚書劉體乾罷先是內供不足數下戶部取之太倉又令買金雲南體
乾多執奏不即奉詔雲南年例金至是過期不至有中旨詰責體乾引
罪 上以體乾教抗旨手詔勘問勒令間住給事中光懋監察御史凌
瑄等交章留之不聽○御史賈三近疏陳吏治言州縣長吏毋得偏重
進士署印毋得濫受雜流吏部是其議詔允行之○八月浙江湖州府
山崩成湖○詔釋戶科給事中李巳于獄為民刑科給事中舒化等請
釋李巳及內犯張恩等分別情罪重輕行罰旨令釋巳為民恩等繫獄
如故始法司意恩等有內援欲借以脫巳及巳獨釋衆始翕然謂 上
仁明獨斷左右不得與也○九月詔大禮大獄建言得罪諸臣不許槩
錄大學士高拱上言武反商政止于三事今皇上以子繼父豈宜專事

更張且大禮大獄皆先帝勵精之政而槩議反 典尤非繼體所宜其卹
錄召用亦多偏私 上然之詔自後重論不宥○詔追治錦衣衛都督
陸炳罪籍其家御史張守約追論炳結納嚴世蕃編弄威權播惡流毒
宜剖棺戮屍逮治其子繹姪緒家人陸佐籍其家 旨令姑削其官追奪
誥命子姪俱革職為民家產贓物如數籍入○商古兵部尚書吳嶽卒
嶽汶上人居官清介質真簡易綽有古風而人不取犯士論重之○詔
祀故禮部尚書歐陽德于鄉江西撫按言德文章行業為世所重 上
特允之○虜酋黃台吉等犯遼東大勝堡總兵王治玉及參將卽得功
死之○大學士高拱請別論方士王金等之罪言金等自有當誅之罪
不當以先帝殞于非命不得正其終者罪之 上命多官訊實以聞刑
部尚書葛守禮乃會多官鞫于承天門外盡反金等獄詞吏科給事中
趙奮因上言法司為天下持平昔則一主于入而不思為先帝之地今

則一主于出而曾不恤後世之譏陛下何賴哉宜更將金等重擬若以
金等為從又孰為首必以陶仲文為首今已死矣疏入報聞○河決小
河口自宿遷至徐州三百里皆淤而坡反為河時漕政太弛漕艘五月
入淮八月入閔十月守凍故河水橫決漕艘逆流漂損至八百艘溺死
漕卒千餘人失米二十二萬六千六百餘石○十月虜酋俺荅孫把漢
那吉入邊總督王崇古留之把漢那吉酋婦之所鍾愛以知于俺酋遂
挾其妻闌入邊崇古留之邊吏謹曰此孤豎無足重輕宜勿留崇古曰
此奇貨可居俺荅即急之因而為市諭以執送叛人趙全等還我乃優
遣以慰其抵牾之愛而制其命若弗急則我因而撫納如漢質子法使
招其故部居近塞俺酋老且死而黃台吉勢不能盡有其眾然後以居
者谷蠡秩置塞外其與黃台吉媾則兩利而俱存之弗媾則以師助之
外以博興滅扶危之名而內收其力因上甘諫廷臣譁然以為不可監

察御史葉夢熊乃上疏言把漢那吉之降邊臣不宜遽納朝廷不宜授
以官爵將致結仇激禍上怒其妄言抗亂命降二級外補○詔考察科
道官大學士趙貞吉言頃因御史葉夢熊奏論邊事上于聖怒薄示降
罰足以懲戒矣今因此一人波及諸臣遂令科道考察則將來言路壅
塞士氣消沮願收回成命疏入上報有旨○詔令都察院掌院事大
學士趙貞吉致仕貞吉與高拱于會察日以去留異議不合吏科給事
中韓楫劾奏貞吉貞吉求去遂令致仕○十一月金星晝見三日○詔
許肅府輔國將軍縉熿襲封時縉熿既理府事乃謀襲爵統入賂內官
族延長王真澆代奏禮部尚書殷士儋以條例却之旨曰極邊重地須
用親王鎮之士儋復奏言條例親王絕非親弟姪不得襲縉熿懷王從
父而又駕言極邊夫肅府昔封甘州誠為極邊今徙蘭州則內地矣即
云邊郡但選郡王之賢者以理府事自足捍衛何必更張以徇私情而

撓公典不聽○進禮部尚書殷士儋武英殿大學士入閣參預機務○
十二月浙江曠盜作亂時處州曠徒從昌化突入寧國池州沿江剽掠
江南騷然○以潘晟為禮部尚書張守直為戶部尚書劉自強為刑部
尚書○虜酋俺答執我叛人來獻誅之時把漢那吉留于我酋婦恐我
戕其孫日夜涕脣俺酋亦日夜悔且念乃以款來而擁十萬衆壓境總
督王崇古因諭以存恤恩而要其縛叛示信酋婦感且愧曰漢乃肯全
吾孫吾且啣臂盟世服屬無貳矣有于叛人遂訂盟通貢市馬如約而
諸酋亦貪漢財物願市俺答于是執我叛人趙全等來獻崇古受獻遣
使送歸却吉 上命奏告郊廟獻俘正法以虜款功加崇古少保兵部
尚書賜蟒衣白金世襲錦衣千戶諸臣遷賞有差○尚寶司卿汪宗伊
請申飭守衛上言守衛之設拱護宸極儆戒無虞遏惡未萌統領之以
勳親武臣而以臣等稽察之聖神訂謨萬世當遵恭遇皇上御極百廢

振舉今萬邦入覲華夷具瞻矧茲守衛關係朝儀若不整肅何以壯帝
居之威為四方之極因條上法所當申飭者三事一換直一稽考一開防上俱嘉納之

辛未隆慶五年

春正月甲子朔○巳丑京師大風揚塵四塞○給事中筮東光請肅朝
儀時未奉旨而舉朝譟笑以為迂東光憤薄遂發狂疾○二月百官謁
見皇太子于文華左門先是太子李春芳上言東宮未出閣時閣臣
宜以期望次日行謁見禮不惟臣等獲遂瞻仰之私而東宮亦可閑習
禮儀養成儲德 上許之至是文武群臣及天下朝覲官謁見于文華
左門○御史汪文輝疏陳治體四事以責言官一觀望當戒二紛更當
戒三苛刻當戒四護短當戒末言大臣意見稍殊嫌隙遂起觀望者潛
察低昂窺所向而攻所忌勢無常勝情亦隨更叛服態變于終朝賢佞
評更于月旦或鄉黨故舊意氣激成致傷國體論人不先大節乃拾其

已往揣其將來陰私之影響言詞之疑似形諸章奏彼此相詬人已兩失揔之在秉政者勿用希旨之人夫希旨之人果可終信而不吾叛乎安知不黨同伐異陰設機械以中傷善類乎况宰相不以揀時為賢當以格心為本格心之要在去詭遠佞使賢者得行其志願陛下慎選言官申勅大臣以消朋比之私回淳厚之俗時高拱執政小人昔附徐階者皆反面獻諛下石于階故文輝特言之奏入不十日外補僉事以去然言雖不用識者韙之○會試天下舉人命吏部尚書建極殿大學士張居正吏部左侍郎掌詹事府事呂調陽為考試官取鄧以讚等四百人○詹太監陳洪弟都為錦衣千戶掌鎮撫司事科臣劾之不聽○議開膠萊河初嘉靖中山東副使王獻請循元人海運遺跡于膠萊間開河渠一道由淮安清河清江浦歷新閘海倉口以達天津道里甚近徑度不過千六百里又可以避海洋之險業已從其議開鑿將畢會獻去

官遂罷其役至是戶科給事中李貴和言比歲河決轉餉艱難請脩獻遺策開膠萊新河復河運以濟餉運 上以事體重大遣工科給事中胡價往視之河道都御史萬恭乃上言黃河自西而東淮自南而北會於清河口東南入海夏秋海潮既盛河復騰湧河不得入海逆流入淮淮不能敵故河水道流而泥沙一擁遂成澱淤既淤則必衝踈土而決之矣今唯疏其下流捍其決口水將自順毋煩多謀以滋勞費時因議開膠河恭行令山東郡邑試之云中有河道亦可漸濬而浮沙百里旋開旋塞其頑石粗礮不可鑿者五十里有奇徒勞費無成奚容更議既而價勘視還亦以為不便事遂寢○詔議北虜封貢 上御文華殿日講大學士李春方面奏北虜封貢事宜具言外示羈縻內修守備之意上曰卿等既議允當其即行之先是諸司條陳與王崇古議互有異同 上以為未當令部臣更議至是兵部尚書郭乾請如崇古議○廷

試賜張元汴劉瑛鄧以讚等進士及第出身有差○辛巳日暈有珥白虹亘天左右戟氣俱蒼白色○禮科給事中張國彥進召對錄國彥言召對一節廼先朝大學士李時所記召對錄始于嘉靖九年終于十五年政事因革人材進退罔不召問臣僚面決可否與家人無異乃今日所當記述者謹以前錄撮其大要總二十九條繕寫上進伏望遵行先朝盛事詔留覽○詔起吏部尚書楊博禮部尚書高儀○封虜酋俺荅為順義王時俺荅欵塞廷議封貢已決乃封俺酋為順義王諸虜皆解辮受封比屬國而俺酋弟老把都駐牧上谷有五子十萬騎強盛耻與俺荅會盟上谷諸節帥務以餌中之飽其欲于是利漢財物從俺荅上表通貢封其父子官有差老酋益驕時有所挾以要財傾無美老酋死其子故誣為中國所覬索賂乃已而少子滿五大者桀驁叵測盡有其父鐵騎時時近塞為患將帥竭力啖之匿不以聞○夏四月浙江杭州

府栗樹生桃○戊午京師大雨電○左都御史葛守禮疏陳官箴士節六事曰端趨向崇節儉正心術勤職業敦禮讓弘器度請諭今歲進士使知遵守 上然之○五月中樞殿大學士李春芳致仕時春芳位居高拱上與拱不合言者峻擊不休乃五上疏乞罷許之○巡按陝西御史蕭廩請留榆林鎮入衛軍報聞○六月辛卯朔京師地震者三○乙卯雷震圓丘廣利門鴟吻碎之○秋七月命陝西織造羊絨計三萬二千二百四十四匹計價七十五萬兩巡按御史乞寢之不聽○南京司設監監丞田孜以盜帑戍邊○詔令學倉驛遞官得選本省掌吏部大學士高拱上言國家用人不得官干本土此惟有民社之責者則然耳若夫學倉驛遞等官非有民社之責其官甚卑其家甚貧一授遠官或棄官而不能赴或去任而不能歸零丁萬狀其情可憫近例教官得授本省地方甚以為便乞視此為例從之○八月俺荅上表稱貢賜大紅蟒

衣黃台吉把都那吉等賞賚有差○宣大總督王崇古疏陳北虜互市
事竣馬市無擾加太子太保及總副叅遊金幣有差俺荅既入貢邊防
大弛軍餉皆入帥帑以啗虜間以遺京貴近邊卒餒瘠無復生理而版
升生齒日蕃強梗無賴識者憂之○工部尚書朱衡疏議漕河上言國
家初制漕運悉資泉流自景泰以後由黃河入運奪漕為河由是河身
侵廣淤沙歲積不得不藉黃河以行故今徐邳之漕河即黃河也往時
河趨濟博則決曹單魚沛而沽頭上下諸閘盡廢後趨邳遷則決野鷗
岡口下臺泗而徐呂二洪頓涸今沛邑新河既成縱決曹魚可保無恙
而茶城以南猶屬黃河非盡斥遠之無以善後乞將議者開涸口之說
下諸臣熟計報可○九月兵部尚書郭乾致仕以譚綸為兵部尚書○
議復遮洋總時給事中宋良佐等上言國初運糧率因元故自會通河
成而海運始罷然遮洋一總猶寓存羊之意至嘉靖末科臣胡應嘉欲

市恩桑梓諸軍建議罷廢而海運遺意無復有存焉者今河變頻仍運
道屢梗宜將遮洋一總盡行議復務足原額以存海運遺意如該總隸
北衛兌北糧者令由天津入洋抵薊州隸南諸衛兌南糧者令由淮入
洋抵京通仍博訪國初並海諸衛所舊制使列障連屯彼此相望即河
渠少梗而彼塞此通亦思患預防之策也部議言遮洋一總先時徑渡
天津海口不過八九十里今欲涉海運餉事難造次乞先復遮洋一總
而以良佐所上事宜下漕司詳議以聞○詔以故禮部尚書薛瑄徙祀
孔子廟庭○十月河道潘季馴請重盜決河防之罪疏言每歲河決之
由河流衝射居十之四而居民盜決則十之六皆以法輕易犯故也按
問刑條例有故決盜決河防之律在河南山東者俱問發充軍而南直
隸徐邳一帶罪止于徒請自今以後徐邳上下為河流所經行處凡有
貪水利避水患盜決故決者一如河南山東例俱發充軍仍增入條例

中議下刑部尚書劉自強覆請從之○十一月大學士殷士儋致仕○
庚午天鼓鳴○上有事于南郊禮科給事中蔡汝賢疏請攝養聖躬言
近因長至道駕竊窺聖容微減于前夫皇上一身關係甚大不可不慎
今微陽初生正宜遏欲養靜之時願于宮中澄心滌慮進御有常毋令
溺志遊觀有度毋令移情惟省覽典謨訓誥以陶養此心親近師傅公
孤以維持此心自然欲寡氣清神凝體固宗社生靈之幸疏上報聞○
十二月詔行皇太子冠禮 上諭禮部言皇太子明春講讀先行冠禮
擇日具儀以聞

壬申 隆慶六年

春正月戊午朔○戶部尚書張守直致仕以王國光為戶部尚書○刑
部尚書劉自強致仕以王之誥為刑部尚書○叙遼左功加都督總兵
李成梁太子太保高拱加柱國中極殿大學士張居正加太子太師俱

應子世襲錦衣千戶殷士儋加少保及在籍輔臣趙貞吉俱應子中書
舍人○命錄顏氏裔孫嗣慎襲五經博士○二月 皇太子冠 上御
皇極殿文武群臣入賀仍賀 皇太子于文華左門○召起少傅兼太
子太傅吏部尚書楊博加太子太師掌兵部事○遣內臣督織造于蘇
杭言官力諫不聽工部言蘇杭兵荒久困不可再擾即遣內臣必擇忠
謹安靜者以往 上可之命擇最要者以進且務安靜毋擾民○閏二
月 上御皇極門疾作還宮御史蕭燧上言冊典履行宮掖太盛神氣
太勞以致聖躬不安乞節欲以延壽命不報○癸酉赤風揚塵蔽天○
安慶江卒作亂巡撫張佳胤平之先是以安慶府為江防要地設守備
武臣督兵卒以備江盜後武弁多令僕夫冒餉更自為盜往往白晝殺
人掠其財于是以城卒與江卒更番巡警江卒不得逞嘗懷忿恨及懷
寧尉巡城撲其怠者則江卒也遂奮臂起以挺擊尉指揮馬負圖因誅

之曰擊尉法當死盍大逞或免乎乃誘張承祖調屯軍張志學發器械帥江卒百千人軟血盟于旗燾祠與守備楊遇春共縛尉及郡倅攻郡未得入巡撫張佳胤至遂誘諸武備而誅其渠魁亂乃平佳胤因請設兵備于池州府上言應天徽寧池太安慶廣德地理遼曠崇山大江盜賊淵藪舊以徽隸金衢道安隸九江道近如曠賊流劫徽池而浙兵不救安慶江卒作亂而該道罔聞太平軍民呼譟入府而僅以和解焉有地方四千里而無一憲司以鈐束之者乞於池州設兵備而罷二道之遙制者為便報可○三月 皇太子出閣講學○議復海運山東左布政王宗沐聞給事中宋良佐議乃力主海運之說于是遷總督漕運副都御史提督軍務巡撫鳳陽等處因上疏言國有漕運猶人身有血脉血脉通則人身康漕運通則國計足我朝運河幾百六十年疏通無滯今茲黃河泛溢數患漂流故科臣議復海運而縉紳之慮猥云風波夫

風波在海三尺童子知之然其利害則有辨矣古云地不滿東南東南之海衆水所委渺茫無山則趨避靡及近南水煖則蛟龍穴居故元人海運多警言若起自太倉嘉定而北自淮安而東引登萊以泊天津茲謂北海中多島嶼可以避風蛟龍有往來而無窟穴又其地高多山石舟至登萊因其曠達以取其速又且標記島嶼以避其患則當今佐河運之缺計無便于此者然此猶幸時宜而言者語全勢則其說有三一曰天下大勢二曰都燕專勢三曰目前急勢夫風波係天数臣豈能料其必無趨避占候使其不爽當不足以妨大計惟聖明採擇因條上海運七事部議如宗沐言詔允行之○詔謫尚寶司丞劉奮庸外補時奮庸條上五事言皇上即位以來六年矣海內非不乂安而災沴未息外夷非不威順而伏機可慮朝政若飭而權柄漸移仕路若清而宿蠹如昔精神意氣漸不逮初臣藩邸舊臣胡忍緘默謹條為五事以聞一曰保

安聖躬言乞凝神定慮忍性抑情毋逞旦夕之樂而輕百年之慮毋以有限之體而當衆欲之攻則聖德日清而聖壽益永二曰總攬大權言先帝英明果斷恩威莫測臣下斂手莫敢弄權今政府之所擬議百司之所奉行人才之用舍國是之更張果出于宸斷乎協于公論乎即輔導東宮乃閣臣之職而敢圖身便朝廷名器本礪世之具而敢以市恩先帝之世孰敢為此乞大奮乾綱獨觀萬化則上下莫測其機而政柄不至偏重三曰慎乃儉德言歲費有經入不酬出今內府取銀已數十萬求珍寶作鰲山鏤金雕玉國計日虛所宜痛戒四曰留心章奏言諸臣章奏或闕君德或言朝政或評人品或酌時事皆以效忠匪有要挾乞當理者必庸狂直者必恕以來忠益五曰起用忠直言即位以來或以勤政諫或以節用諫或以進賢退不肖諫非承望風旨而攻擊以洩憤非迎合權要而薦拔以樹恩皆本于忠直乃遭斥逐乞嘉其批鱗速

用以盡其才疏上外補謫知興國州○大學士高拱乞罷不許時給事中曹大埜論劾拱大不忠十事言前者聖體違和大小群工寢食不寧獨拱言笑自若且過姻家飲酒作樂不忠一也東宮出閣講讀當日侍右左乃欲三八日叩頭而出是不以事陛下者事東宮不忠二也自拱復用即以復仇為事昔人直言拱罪如岑用賓數十人一切降黜不忠三也自拱掌吏部副使曹金以子女親家起擢至刑部侍郎給事中韓楫以親愛門生超擢為右通政不忠四也科道朝廷耳目拱乃蔽塞言路戒諭不許言大臣過失不忠五也科道多拱心腹凡拱罪惡隱諱不言知有拱而不知有陛下不忠六也昔嚴嵩止總閣事今拱兼掌吏部用舍予奪皆在掌握權重于嵩專權放恣不忠七也昔嚴嵩止子世蕃貪財納賄今拱親開賄賂之門受副使董文寀金六百而叅政河南受侍郎張四維金八百而取侍東宮職跡太露不忠八也沈鍊劾嵩謫發

保安楊順路楷誣鍊殺之人人切齒乃受楷千金強辯脫楷不忠九也給事中吳時來昔在先朝抗疏論嵩所謂忠臣也拱以私恨借一小事黜之大學士徐階受先帝顧命所謂元老也拱以私恨多方害之必欲置之死地不忠十也請如先帝處嵩故事特賜罷黜 上責大桎妄言命外調拱乞罷 上慰留之時已不聽拱去而尚書楊博等連章乞留識者以為諂云○夏四月浙江黑青見時杭州府黑霧中一物蜿蜒如車輪目光掣電水電隨之屋瓦皆震林中鳥雀擊死無筭○詔進禮部尚書高儀兼文淵閣大學士入閣參贊機務○司禮太監孟冲請補六科廊書寫官匠從之先是司禮滕祥請汰匠役工部言已裁者尚爾占役奚以查為 上命祥查之裁二千四百四十人至是冲復請補六科廊寫字官匠八十六人 上許之部執奏先經滕祥查革未久輒更何以示信且起各監紛紜之端不報○詔復胡宗憲原官賜卹典時給事

中劉伯燮上言故三邊總督曾銑浙直總督胡宗憲皆立功之臣竟以罪死臣甚惜之銑恢復河套任事過勇而謀或踈宗憲依憑權勢靡費軍餉與夫殺戮過慘不能無罪然當倭奴憑陵之際卒以討擒首惡海波遂寧此其功罪亦當相準銑既蒙贈廕而宗憲未獲昭雪則何以為邊臣之勸宜加少恤錄乃詔復宗憲官仍賜諭祭○五月工部尚書朱衡疏陳漕議言防河如防虜守堤如守邊河南累被河患大為堤防今幸有數十年之安以防守嚴而備禦素也徐邳為糧運正道既多方以築之宜多方以守之因條上三議一議夫役言自徐州至小河口新築堤三百七十里設防守夫三千七百名二議舖舍言三里建一舖一舖計屋三楹四舖設一老人統率晝夜巡視三議定期言五月十五日上隄九月十五日下午隄願携妻子居住者聽疏入得旨允行○龍目井化為酒○上不豫召輔臣入受顧命已酉 上疾大漸召大學士高拱張

居正高儀至乾清宮受顧命拱等疾趨至宮 上倚坐御榻中宮及皇貴妃咸在御榻邊東宮立于左拱等跪御榻下命宣顧命曰朕嗣祖宗大統方今六年偶得此疾遽不能起有負先皇付託東宮幼小朕今付之卿等宜協心輔佐遵守祖制保固皇圖功在社稷萬世不泯拱等咸痛哭叩首而出蓋自孝廟顧託三臣之後僅再見云○上崩於乾清宮庚午 上崩壽三十六○六月皇太子即皇帝位時年十齡詔以明年為萬曆元年○上大行皇帝尊謚曰契天隆道淵懿寬仁顯文光武純德純孝莊皇帝廟號穆宗

謹按謚法布德執義曰穆履正志和曰莊

秋七月加上孝懿皇后李氏尊謚曰孝懿貞惠順哲恭仁儷天襄聖莊皇后○加上皇后陳氏曰仁聖皇太后皇貴妃李氏曰慈聖皇太后○九月葬昭陵孝懿莊皇后祔葬

謹按史臣曰先時發令嚴具百官兢兢上乃寬仁大度黜不經之祀罷無用之作蠲非藝之征絕無名之獻至如制節謹度好生戒殺嘗食驢膓而甘及即位間以問左右左右請詔光祿常供上曰若爾則光祿必日殺一驢以備內膳吾不忍也歲時游娛行幸諸光祿供膳必先期以請候上旨為豐約上嘗裁取最約者歲省光祿費以巨萬計其恭儉如此言事之官雖震怒然責諫後嘗釋遣之留心邊事憂形於色穹廬大漠之長慕象來王哨峒憑林之孽俛頸就縛即史稱鳴鍾清渭懸首北關未足以喻其烈也至若守祖宗之法無紛更約束之煩先儲貳之教為久安長治之計皆獨斷于宸衷雖享國未久規模弘遠矣

必夫賦以詩新士皆
 先公少日途一觀以對內
 會觀而甘文明於
 羅無用之自臨非
 精對史曰曰去知
 人其不路之所

右

兩朝聞見紀記之自 先公而編次則吾伯兄力也 先

公生平清苦賦性正直媿時俛仰羞語浮沉年未艾即

解組歸曾夢贈墨舟却之不得自是杜門著述硯幾穿

而退筆亦可有家即今家藏有春秋分國本末便覽春

秋經傳集解宋史詳節諸史撮抄三黨編諸書俱各不

下數十卷似皆可傳所苦食負無力錢布而此紀特其

一耳不肖秋陽生甫四齡 先公見背即荷伯兄中才

之養伯兄苦志力學同社友率多致身青雲而伯兄尚
不能博一第日坐臯比授易從遊頗衆諸弟輩亦日侍
函丈前嘗道先公言一事不知儒者之恥策不知今
判不知律今時之弊以故譚藝暇博考今古亦多纂述
此紀則因先公未竟之業而卒成之者也編次竣事
廼命弟輩參互校閱嗚呼箕業章之棣華譚之聯芳濟
美曷副初心殆不能不有感於茲因綴數語於末簡用
識歲月時蓋己亥七月旣望也不肖孤

秋陽謹記



